

OSCAR VIDAL: ADEMAS DI SU TRABAO TA EHERCE HOBBYNAN INTERESANTE



ORANJESTAD (AAN) - DIARIO ta bay trese den cada edicion special pa hubentud, un entrevista cu un di nos talentonan hoben, cu ta desempeña caba cu nan habilidad special. Awe nos ta entrevista Oscar Vidal, kende, entre otro, ta haci tatuaje, ta miembro di un brass band, y di un grupo di gaita, y ademas ta periodista.

Oscar tin mas of menos 10 aña haciendo tatuaje. El a siña mirando otronan realizando e trabao aki. Pa haci tatuaje un persona mester sa con pa pinta, y ta asina cu na school e tabata gusta pinta, y el a mostra bastante habilidad pa haci esaki.

Den principio Oscar tabata usa e sistema antiguo cu ta consisti di "prik" cu punta di cadushi. Tabata lora hilo di cose rond di e punta di cadushi y asina tabata implanta ink den e cuero.

"Mas of menos 3 aña pasa, mi a cuminsa usa mashinnan profesional, importa for di New York. Esaki mi ta hacie pa hobby. Como cu tur dia mi kier siña algo nobo den e mundo di tatuaje, mi ta lesa

hopi buki di e materia aki, cu mi ta busca di exterior. Aunque cu hopi hende ta considerami como un experto of profesional, ami mes ta haya cu ainda mi ta falta hopi pa siña, comparando mi mes cu e artistanan grandi cu ta aparece den e revistanan cu mi ta ricibi", Oscar a comenta.

UN CRITERIO ERRONEO

"Hopi hende ta relaciona tatuaje cu personanan di baho mundo. Nan ta kere cu un hende cu tin tatuaje ta un navegante, un bandido, narcotraficante, o' un persona cu a cay cera, etc. Esaki ta un criterio completamente erroneo.

Tatuaje ta un ARTE. Contrario na loke hopi hende ta pensa, hopi pintor actualmente a cuminsa incorpora nan mes den e mundo di tatuaje. Awendia e trabaoonan di tatuaje a evolucionar asina tanto, cu hopi hende no ta kere cu un persona tin un tatuaje riba su curpa, pero e ta pensa cu ta pinta of algo geplak e tin" Oscar a relata.

FIGURANAN

Cada tatuaje ta un reto pa Oscar. Cada persona cu ta acerque pa un tatuaje e ta dedica tur su tempo pa haci lo mehor. E figuranan preferi na Aruba ta varia den animalnan furioso, entre otro, tiger, aguilu, leon, pantera, etc.

Tambe bo ta haya hende cu kier algo mas suave, manera un flor, un tiger pero cu expresion inofensivo, signo di horoscopo, tribal.

"Ultimo temponan mi ta hayando basta peticion di hende muher cu ta hopi interesada den pone un tatuaje. Hopi biaha e cliente ta bini cu su idea pa pone un tatuaje na cierto parti di nan curpa, por ehemplo na parti di man abao, y mi ta conseha pa nan no haci esey. Segun informacionnan cu mi a obtene di e bukinan cu ta lesa, nan ta recomenda un artista pa si un persona ta bini haci un tatuaje pa prome biaha, no lague pone na e partinan ey. Esaki ta pasobra hopi biaha cierto empleonan entre otro, den casino, si un persona tin tatuaje na parti bisto e no ta worde emplea".

Segun Oscar a splica, tin diferente tipo di ink. Na Aruba ta conoci e asina yama "Oost Indische Ink", cu hopi persona ta usa pa haci tatuaje ordinario. Ta worde comenta cu e ink cu ta ser usa pa tatuaje ta duna cancer. Pa evita cualquier posibel problema cu e cuero, Oscar ta importa e ink directamente for di un compania renombra na New York, cu tin 35 aña di existencia. E tinta aki, gran parti ta consisti di alcohol.

Oscar Vidal tin reglanan pa un persona cu kier haci tatuaje. Na prome lugar e no ta haci tatuaje pa un mucha menor di edad. Na di dos lugar, e no ta haci tatuaje pa hende bao influencia. Si e ta haya cu e tatuaje no ta bay keda e persona bon tampoco e ta hacie, pasobra mañan, ora e persona aki ta cana rond ta e artista ta haya mal propaganda.

"E punto cu mas atencion mi ta pone riba dje ta pa tur mi equiponan ta completamente limpi, desinfecta, y esteriliza.

Esaki pa tanto seguridad di e persona como ami mes pa cualquier eventual contagio di malesa".

Oscar musico:

DOS INQUETUD MUSICAL CU A NACE NA SCHOOL: GAITA Y BRASSBAND



ORANJESTAD (AAN) - Oscar Vidal ta conta nos con su inquietud musical a nace, y di con el a bira manager di un grupo di gaita y miembro di un grupo di Brass Band.

"Como estudiante na De La Salle College, mi tabata masha interesa den Brass Band. E conocido musico Rufo Odor ta maestro na dicho school y alavez tabata dirigi un famoso brass band cu tabata conta cu musiconan di renombre manera Joy Kock, Etty Toppenberg, Maiky Lacle, Ronny Brete.

Durante fin di siman, ora e brass band tabata ensaya na dicho school, ami tabata tynan manera "un clabo" pa asina mira y alavez siña con ta toca e ritmo asambleo cu ta masha popular awendia. Na dado momento mi a haya oportunidad di forma parti di e brass band "Daimari" cu

tabata e fundador di e conocido brass band "The Moon Dogs". Di eynan mi a sigui forma parti di un cantidad di brass band, entre otro, Royal Stars, Jaming Brass, Kids of Fame, Escape Brass, Academy Brass y finalmente, Savage Brass".

Tocante su participacion den gaita, Oscar ta bisa nos: "Na De La Salle tabata tin un customer cu den tempo di pasco tabata tin celebracion na school. Mi a participa den diferente comedia bao direccion di entre otro, Karel Nicolaas, cu awe ta cabesante na Filomena College.

Despues Meneer Wever a stimula diferente alumno entre otro, Johnny Castro, Robert Lesire, y ami, kenden te e dia di awe ta forma parti di e Grupo "Tradicion Gaitera". Nos a cuminsa toca pa un fiesta na SIMAR, caminda e maestronan a goza un mundo di e forma con nos tabata expresa e musica di gaita. Wever ta esun cu a keda stimula nos pa sigui cu e grupo y te dia di awe mi ta gradici na dje cu ainda e grupo ta riba pia, despues cu mas cu diez aña.

Tambe mi kier a duna palabra di danki na Rufo Odor, cu a duna mi basta guia pa loke ta trata guia un grupo, y tur e maestronan cu a sa di soporta nos y apoya nos te caminda cu nos ta awe".

